

重刊巢氏諸病源候總論卷之三

癰疽病諸候

下

凡二十九論



緩疽候

緩疽者由寒氣客於經絡致榮衛涖澁氣血壅結
所成其寒盛者則腫結痛深而回回無頭尾大者
如拳小者如桃李冰冰與皮肉相親著熱氣少其
腫與肉相似不甚赤積日不潰久乃變紫黯色皮
肉俱爛如牛領瘡漸至通體青黯下作頭而穿潰
膿出是也以其結腫積久而肉腐壞遲故名緩疽
亦名肉色疽也緩疽急者一年殺人緩者數年乃

死

燔疽候

燔疽之狀肉生小黯點小者如粟豆大者如梅李或赤或黑乍青乍白有實核燥痛應心或著身體其著手指者似代指人不別者呼為代指不急治毒逐脉上入臟則殺人南方人得此疾皆截去指恐其毒上攻臟故也

又云十指端忽策策痛入心不可忍向明望之晃晃黃赤或黯黯青黑是燔疽直截後節十有一異又云風疹痛不可忍者燔疽發五臟俞節解相應

通洞燔疽也諸是燔疽皆死又齒間臭熱血出不止燔疽也七日死治所不瘥以灰掩覆其血不爾著人

又云諸是燔疽皆死唯痛取利十有一活耳此皆毒氣客於經絡氣血否澁毒變所生也

疽發口齒候

寒氣客於經絡血澁不通結而成疽五臟之氣皆出於口十二經脉有入齒者有連舌本者榮衛之氣無處不行虛則受邪挾毒乘虛而入脉故也其發口齒者多血出不可禁皆死

行疽候

行疽候者發瘡小者如豆大者如錢往來市身及生面上謂之行疽此亦寒熱客於腠理與血氣相搏所生也

風疽候

腫起流之血脉而攣曲疾... 候瘡歷年謂之風疽此由風濕之氣客於經絡與氣相搏所成也
養大解汗當以粉粉身若令自乾者成風疽也

石疽候

此由寒氣客於經絡與血氣相搏血澁結而成疽也其寒毒偏多則氣結聚而皮厚狀如瘞癰鞞如石故謂之石疽也

禽疽候

禽疽發如胗者數十處其得四日腫合牢核痛其狀若變十日可刺其初發身戰寒齒如噤欲坐如是者十五日死也此是寒濕之氣客於肌肉所生也

杼疽候

杼疽者發項及兩耳下不瀉十六日死其六日可

刺其色黑見膿如癰者死不可治人年三十九
二十三三十五三十九五十一五十五六十一八
十七九十九神皆在兩耳下不可見血見血者死
此是寒濕之氣客於肌肉折於血氣之所生也

水疽候

此由寒濕之氣客於皮膚搏於津液使血氣否澁
濕氣偏多則發水疽其腫狀如物裏水多發於手
足此是隨肌膚虛處而發也亦有發身體數處而
壯熱遂至死

肘疽候

肘疽是疽發於肘謂之肘疽凡諸疽發節解並皆
斷筋節而發肘者尤爲重也此亦是寒濕之氣客
於肌肉折於血氣所生也

附骨疽候

附骨疽者由當風入骨解風與熱相搏復遇冷濕
或秋夏露卧爲冷所折風熱伏結壅遏附骨成疽
喜著大節解間丈夫及產婦女人喜著鼠牒髀頭
胫膝間嬰孩嫩兒亦著臂肘背脊也其大人老人
著急者則先覺痛不得轉動授之應骨痛經日便
覺皮肉生急洪洪如肥狀則是也其小兒不知字

名抱之纔近其便畧喚則是支節有痛處便是其候也大人老人著緩者則先覺如肥洪洪耳經日便覺痺痛不隨也其小兒則覺四支偏有不動不動搖者如不隨狀看支節解中則有肥洪洪處其名不知是隨骨疽乃至合身成膿不潰至死皆覺身體變青黯也其大人老人皆不悟是疽乃至於死也亦有不別是附骨疽呼爲急賊風其緩者謂風腫而已

久疽候

此由寒氣客於經絡折於氣血血澁不通乃結成

疽凡疽發諸節及腑臟之俞則卒急也其久疽者發於身體閑處故經久積年致膿汁不盡則瘡内生蟲而變成癩也

疽虛熱候

此由寒搏於熱結壅血澁乃成疽疽膿雖潰瘡之後餘熱未盡而血已虛其人喑喑苦熱愒愒虛乏故謂虛熱也

疽大小便不通候

此由寒氣客於經絡寒搏於血血澁不通壅結成疽腑臟熱不泄熱入大小便故大小便不通也

癰發背候

夫癰發於背者多發於諸腑俞也六腑不和則生癰諸腑俞皆在背其血氣經絡於身腑氣不和腠理虛者經絡為寒所客寒折於血則壅不通故結成癰發其俞也熱氣加於血則肉血敗化故為膿癰初結之狀腫而皮薄以澤又云背上忽有赤腫而頭白搖根入應胷裏動是癰也又發背若熱手不可得近者內先服王不留行散外摩背膏大黃貼若在背生破無苦良不得膿以食肉膏散著瓮頭內癰口中人體熱氣歇服木散五日後癰欲瘥

者服排膿內塞散

癰發背潰後候

此由寒氣客於經絡折於血氣血澁不通乃結成癰發背癰膿出之後眼白睛青黑而眼小一逆也內藥而嘔二逆也傷痛渴甚三逆也髀項中不仁四逆也音嘶色脫五逆也此等五逆者皆不可治也或熱或渴非倉卒而急可得漸治之也凡發背則熱氣流入腑臟膿潰之後血氣則虛腑臟燥熱渴而引飲飲冷入腸胃則變下利胃虛氣逆則變嘔也嘔逆若遇冷折之氣不通則噦也其瘡若膿

汁不盡而瘡口早合雖瘡更發惡汁連滯則變成癢也

癰發背後下利候

此是寒氣客於經絡折於血氣血澁不通乃結成癰癰發後利者由內熱而引飲取冷太過冷入腸胃故令下利不止則變嘔所以然者脾與胃合俱象土脾候身之肌肉胃爲水穀之海脾虛則肌肉受邪胃虛則變下利下利不止氣逆故變嘔嘔而遇冷折氣逆不通則噦也

癰發背渴候

此由寒氣客於經絡折於氣血血澁不通乃結成癰也癰發背五臟熱盛虛燥故渴而冷飲入腸胃則變利也

癰發背兼嗽候

肺主氣候於皮毛氣虛腠理受寒客於經絡則血否澁熱氣乘之則成癰也肺氣虛其寒復乘肺肺感於寒則成欬嗽故發癰而兼嗽也

癰發背大便不通候

此由寒氣客於經絡血氣否澁則生熱蘊結成癰氣壅在臟腑熱入腸胃故令大便不通也

癰發背惡肉不盡候

此由寒氣客於經絡折於氣血血澁不通乃結成癰發背膿潰之後外有風氣搏之變生而惡肉壅塞瘡者則毒氣內侵須傳藥以食之

疽發背候

疽發背者多發於諸臟俞也立臟不調則發疽五臟俞皆在背其血氣經絡於身腑臟不調腠理虛者經脉爲寒所客寒折於血血壅不通故乃結成疽其發臟俞也熱氣施於血則肉血敗腐爲膿也疽初結之狀皮強如牛領之皮是也疽重於癰發

者多死又發起肺俞若肺俞不瀉二十日死其八日可刺也發而赤其上肉如椒子者死不可理人年十九二十五三十三四十九五十七六十七三十八十一九十七神皆在背不可見血見血者死蜂疽發背起心俞若臑髑二十日不瀉即死其八日可刺也其色赤黑膿見青者死不治人年六歲十八二十四四十五十六六十七六十二九十八神皆在臑不可見血見血者死

疽發背潰後候

此由寒氣客於經絡折於氣血血澁不通乃結成

疽發背疽膿出之後眼白睛青黑而眼小一逆也
內禁而嘔二逆也傷痛渴甚三逆也髀項中不便
四逆也音嘶色脫五逆也皆不可治自餘或熱湯
或刺嘔非倉卒之急也可得漸治凡發背則熱氣
流入腑臟膿潰之後血氣則虛腑臟積熱渴而引
飲飲冷入於腸胃則變下利胃虛氣逆則變嘔也
嘔逆若遇冷折之氣不通即噤也其瘡若膿汁不
盡而瘡口早合雖瘡更發惡汁連滯則變成癩也

疽發背熱渴候

此由寒氣客於經絡折於氣血血澁不通乃結成

疽疽發背則腑臟皆熱熱則臟燥故渴也而冷飲
入腸胃則變利也

腸癰候

腸癰者由寒溫不適喜怒無度使邪氣與榮衛相
干在於腸內遇熱加之血氣蘊積結聚成癰熱積
不散血肉腐壞化而爲膿其病之狀小腹重而微
強抑之即痛小便數似淋時時汗出復惡寒其身
皮皆甲錯腹皮急如腫狀診其脈洪數者已有膿
也其脈遲緊者未有膿也甚者腹脹大轉側間水
聲或繞臍生瘡穿而膿出或膿自臍中出或大便

去膿血惟宜急治之又云大便膿血似赤白下而寔非者是腸癰也卒得腸癰而不曉治之錯者殺人寸脈滑而數滑則爲實數則爲熱滑則爲榮數則爲衛衛下降榮上升遇熱榮衛相干血爲濁敗小腹否鞭小便或難汗出或復惡寒膿爲已成設脈遲緊聚爲瘀血血下則愈膿成引白又諸浮數脈當發熱而反洗浙惡寒若有痛處者當積有膿脈滑濇者小腸癰出血者也

生方云六畜卒疫死及夏病者腦不中食喜生癰也

內癰候

內癰者由飲食不節冷熱不調寒氣客於內或在胃鬲或在腸胃寒折於血血氣留止與寒相搏壅結不散熱氣乘之則化爲膿故曰內癰也胃內痛少氣而發熱以手按左眼而其右眼見光者胃內結癰也若不見光燦疽內若吐膿血者不可治也急以灰掩其膿血不爾者著人腸內有結痛或在腸下或在臍左近結成塊而壯熱必作癰膿診其脈數而身無熱者內有癰

養生方云四月勿食螺雞肉作內癰在胃掖下出

癘也

肺癰候

肺癰者由風寒傷於肺其氣結聚所成也師主氣候皮毛勞傷血氣腠理則開而受風寒其氣虛者寒乘虛傷肺寒搏於血蘊結成癰熱又加之積熱不散血敗爲膿肺處胃間初肺傷於寒則微嗽肺癰之狀其人欬胃內滿隱隱痛而戰寒診其肺部脉緊爲肺癰又肺癰喘而脚滿又寸口脉數而實咽乾口內辟辟燥不渴時時出濁唾腥臭又又吐膿如粳米粥者難治也又肺癰有膿而嘔者不須

治其嘔膿止自愈又寸口脉微而數微則爲風數則爲熱微則汗出數則惡寒風中於衛呼氣不入數過於榮吸而不出風傷皮毛熱傷血脉風舍於肺其人則嘔口乾喘滿咽燥不渴唾而濁沫時時戰寒熱之所過血爲凝滯蓄結癰膿吐如米粥始萌可救膿成則死又欲知有膿者其脉緊數膿爲未成其脉緊去但數膿爲已成又肺病身當有熱欬嗽短氣唾出膿血其脉當短濇而反浮大其色當白而反赤者此是火之剋金大逆不治也

膈病候

膈病者由勞役肢體熱盛自取風冷而為涼濕所折入於肌肉筋脉結聚所成也其狀赤脉起如編繩急痛壯熱其發於脚者患從鼠牒起至踝赤如編繩故謂膈病也發於臂者喜掖下起至手也可即治取消其漬洗勝則筋攣也其著脚若置不治不消復不潰其熱歇氣不散變作廔腫緩瀆相搏腫膈已成膿也

瘰癧候

瘰癧者由風濕冷氣搏於血結聚所生也人運役勞動則陽氣發泄因而汗出遇風冷濕氣搏於經

絡經絡之血得冷所折則結澁不通而生瘰癧腫結如梅李也又云腫一寸二寸瘰也其不消而潰者即宜熟捻去膿至清血出若膿汁未盡其瘡合者則更發其著耳下頰頸掖下若膿汁不盡多變成瘻也

養生方云人汗入諸食中食之作癰瘰

又云五月勿食不成核果及桃棗發癰瘰也

重刊巢氏諸病源候總論卷之三十三

重刊巢氏諸病源候總論卷之三十四

瘰癧病諸候

凡三十五論

諸瘰癧候

諸瘰癧者謂瘰癧病初發之由不同至於瘰癧成形狀亦異有以一方而治之者故名諸瘰癧非是諸病共成一瘰癧也而方說九瘰癧者是狼瘰癧鼠瘰癧蠅蛄瘰癧蜂瘰癧蚘蟬瘰癧蠟瘰癧浮疽瘰癧瘰癧瘰癧轉脉瘰癧此頸之九瘰癧也 狼瘰癧者年少之時不自謹慎或大怒氣上不下之所生也始發之時在於頸項有根出缺盆上轉連耳本其根在肝 鼠瘰癧者飲食之時不擇

蟲蛆變化所生也使人寒熱其根在肺 螻蛄瘻者食果菰子不避有蟲即便噉之外絕於網內絕於腸有毒不去變化所生也始發之時在於頸上狀如蝸形臃腫而出也其根在大腸 蜂瘻者食飲勞倦渴之多飲流水即得蜂毒不去變化所生也始發之時其根在頸歷歷三四處俱腫以潰生瘡狀如癰形瘥而復移其根在脾 蚘蟬瘻者因寒腹中臃脹所得寒毒不去變化所生也始發之時在其頸項使人壯熱若傷寒有似疥癬婁婁孔出其根在肺 蟻螬瘻者恐懼愁憂思慮哭泣不

止餘毒變化所生也始發之時在其頸項無頭尾如棗核或移動皮中使人寒熱心滿其根在心 浮疽瘻者因恚結馳思往反變化所生也始發之時在於頸亦在掖下如兩指無頭尾使人寒熱欲嘔吐其根在膽 瘰癧瘻者因強力入水坐湿地或新沐浴汗入頭中流在頸上之所生也始發之時在其頸項恒有膿使人寒熱其根在腎 轉脉瘻者因飲酒大醉夜卧不安驚欲嘔轉側失枕之所生也始發之時在其頸項濯脉轉身如振使人寒熱其根在小腸 復有三十六種瘻方不可次

第顯其名而有蜣螂蛆蝻等諸瘻非九瘻之名此
即應是三十六種瘻之數也但瘻病之生或因寒
暑不調故血氣壅結所作或由飲食乖節狼鼠之
精入於府藏毒流經脉變化而生皆能使血脉結
聚寒熱相交又則成膿而潰漏也其生身體皮肉
者亦有始結腫與石癰相似所可異者其腫之中
按之累累有數脉喜發於頸邊或兩邊俱起便是
瘻證也亦發兩掖下及兩頰顛間初作喜不痛不
熱若失時治即生寒熱也所發之處而有輕重重
者有兩種一則發口上喙有結核大小無定或如

桃李大此蟲之窠屈止在其中二則發口之下無
有結核而穿潰成瘡又蟲毒之居或府藏無定故
瘻發身體亦有數處其相應通者多死其瘻形狀
起發之由今辯於後章

養生方云六月勿食自落地五果經宿蚘蟥蝻
蜣螂遊上喜爲九瘻

又云十二月勿食狗鼠殘肉生瘡及瘻出頸項及
口裏或生咽內

鼠瘻候

鼠瘻者由飲食不擇蟲蛆毒變化入於府藏出於

脉稽留脉内而不去使人寒熱其根在肺出於頸掖之間其浮於脉中而未肉著於肌肉而外爲膿血者易去也決其生死者反其目視之其中有赤脉從上下貫瞳子見一脉一歲死見一脉半一歲半死見二脉二歲死見二脉半二歲半死見三脉三歲死赤脉而不下貫瞳子可治也

養生方云

正月勿食鼠殘食作鼠瘻發於頸項或

毒入腹下血不止或口生瘡如有蟲食

蜂瘻候

蜂瘻者由飲食勞倦渴乏多飲流水即得蜂毒流

入於藏其根在脾出發於頸項歷歷三四處或累累四五處蜂臺或發胷前俱腫以潰生瘡狀如癰形瘥而復移

蟻瘻候

蟻瘻者由飲食有蟻精氣毒入於五藏流出經絡多著頸項戢戢然小腫核細乃遍身體

蚘瘻候

蚘瘻者由飲食內有蚘毒氣入於藏流於經脉使身寒似傷寒腹虛臃脹其根在肺發於頸項如疥癬婁婁孔出初生痒搔之生痕不治一百日

生蚘瘻

蠅瘻候

此由飲食內有蠅窠子因誤食之入於腸胃流注入血脉變化生瘻發於頸下初生痒而如蠅窠子狀使人寒熱久其中化生蠅也

蝮瘻候

蝮瘻者由食果蓏子不避有蟲即便噉之有蟲毒氣入於腹內外發於頸其根在大腸初生之時其狀如風矢亦如蝮形癰腫而痒搔之則引大如四寸更其中生道乃有數十中生蝮瘻亦有十數

不治二年殺人

蟻瘻候

此由恐懼愁憂思慮哭泣不止氣毒變化所生內動藏外藏於頸項其根在心又方根在膀胱初生之時無頭尾腫如棗核或移動皮肉使人寒熱心滿狀似蜂瘻而深坎蜂瘻則高而圓蟻瘻方五寸作坑邊有唇畔而痒搔之則引大如六寸更疼痛日夜令人呻號三年生孔道乃有十數中生蟻瘻乃有百數不治五年殺人

鵬鳥鶴瘻候

鴈鳥鶴瘦者初腫如覆手疼痛一年生孔道數十處黃水出二年化生鶴水鳥首而生口脣是也

尸瘦候

人皆有五尸在人腹內發動令心腹脹氣息喘急衝擊心胃攻刺脇肋因而寒熱頸掖之下結瘰癧膿潰成瘦時還衝擊腹內則脹痛腰脊攣急是也

風瘦候

此由風邪在經脈經脈結聚所成或諸瘡得風不即瘡變作其瘡得風者是因瘡遇冷膿汁不盡乃成也其風在經脈者初生之時其狀如腫有似覆

手搔之則皮脫赤汁出乍腫乍減漸漸生根結實且附骨間不知首尾即潰成瘦若至五十日不消不潰變成石腫名爲石癰久久不治令寒熱惡氣入腹絕悶刺心及咽項悉皆腫經一年不治者死

鞠瘦候

腫痛初生癰如大桃狀亦如瘤膿潰爲瘡不治成石瘦化生鞠作竅傍行世呼爲石鞠瘦

蟻娘瘦候

此由飲食居處有蟻娘毒氣入於藏府流於經脈所生也初生之時其狀如鼠竅直下腫如覆手而

痒搔之疾痺至百日有十八竅深三寸中生蜣螂
乃有一百數蜣螂成尾自覆刺人大如孟升至三
年殺人

骨疽癰候

骨疽癰者或寒熱之氣搏經脈所成或蟲蛆之氣
因飲食入人府藏所生以其膿潰侵食於骨故名
骨疽癰也初腫後乃破破而還合邊傍更生如是
或六七度中有膿血至日西痛發如有針刺

蚯蚓癰候

蚯蚓癰者由居處飲食有蚯蚓之氣或飲食入腹

內流於經脈所生其根在大腸其狀腫核潰漏

花癰候

花癰者風濕客於皮膚與血氣相搏因而成瘡風
濕氣多其肉突出外如花開之狀世謂之反花瘡
不瘥生蟲成癰故謂之花癰也

蠍癰候

此由飲食居處有蝎蟲毒氣入於府藏流於經脈
或生掖下或生頸邊腫起如蝎蟲之形寒熱而潰
成癰久則瘡裏生細蠍蟲也

蚝癰候

疔瘻者由飲食居處有蛇蟲毒氣入於府藏流於經脉變化而生者面頰邊即脫肉結腫初如蛇蟲之窠後潰成瘻而蛇生是也

腦瘻候

腦瘻者頭頸逐氣上下疼痛而後腦瘻

癰瘻候

癰瘻者是癰潰瘡後其不瘥膿汁不盡因變生蟲成瘻故為癰瘻也

瘰癧候

瘰癧者其瘡橫闊作頭狀如杏子形亦似瘰癧

出血是也

蟲瘻候

諸瘻皆有蟲而此獨以蟲為名者是諸瘡初本無蟲經久不瘥而變生蟲故以為名也

石瘻候

石瘻之狀初起兩頭如梅李核鞞實按之強如石而寒熱熱後潰成瘻是也

蛙瘻候

此由飲食居處有蛙之毒氣入於府藏流於經脉而成瘻因服藥隨小便出物狀似蛙形是也

蝦蟆瘻候

此由飲食有蝦蟆之毒氣入府藏流於經脉結腫寒熱因潰成瘻服藥有物隨小便出如蝦蟆之狀又謂之蝦蟆瘻也

蛇瘻候

蛇瘻者由居處飲食有蛇毒氣入於府藏流於經脉寒熱結腫出處無定因潰成瘻服藥有物隨小便出如蛇形狀謂之蛇瘻

螻蛄瘻候

螻蛄瘻者由居處飲食有螻蛄毒氣入府藏流於

經脉所生初得之時如棗核許矣契或滿百日或滿周年走不定一處成竅而膿汁潰瘻也故謂之螻蛄瘻

赤白瘻候

人有患瘡色赤白分明因而成瘻謂之赤白瘻

內瘻候

人有發瘡色黑有結內有膿久乃積生侵食筋骨謂之內瘻

雀瘻候

此由居處飲食有雀毒氣入於藏流於脉發無定

處腫因潰成瘻服藥有物隨小便出狀如雀巖故謂之雀瘻

膿瘻候

諸瘻皆有膿汁此瘻獨以膿為名者是諸瘻久不瘥成瘻而重為熱毒氣停積生膿常不絕故謂之膿瘻也

冷瘻候

冷瘻者亦是謂瘡得風冷久不瘥因成瘻膿汁不絕故如冷瘻也

久瘻候

久瘻者是諸瘻連滯經久不瘥或暫瘥復發或移易三兩處更相應通故為久瘻也

瘰癧瘻候

此由風邪毒氣客於肌肉隨虛處而停結為瘰癧或如梅李棗核等大小兩三相連在皮間而時發寒熱是也久則變膿潰成瘻也其湯熨針石別有正方補養宣導今附於後

養生方導引法云踞踞以兩手從曲脚入據地由脚加其上舉尻其可用行氣愈瘰癧乳痛

潰瘻候

積病之狀陰核腫大有時小歇歇時終大於常勞
冷陰兩便發發則脹大使人腰背卒急身體惡寒
骨節沉重此病由於損腎也足少陰之經腎之脉
也其氣下通於陰陰宗脉之所聚積陰之氣也勞
傷舉重傷於少陰之經其氣不衝於陰氣脹不通
故成積也其湯熨針石別有正方補養宣導令附
於後

養生方導引法云正偃卧直两手两足念月所在
令亦如油囊丹除積少腹重不便腹中熱但口內
氣息出之數十不須小咽氣即腸中不熱者七息

已溫熱咽之十數

痔病諸候

凡六論

諸痔候

諸痔者謂牡痔牝痔脉痔腸痔血痔也其形證各
條如後竟又有酒痔肛邊生瘡亦有血出又有氣
痔大便難而血出肛亦出外良久不肯入諸痔皆
由傷風房室不慎醉飽合陰陽致勞擾血氣而經
脉流溢滲漏腸間衝發下部有一方面而治之者名
為諸痔非為諸病共成一痔痔久不瘥變為瘦也
養生方云忍大便不出又作氣痔其湯熨針石別

有正方補養宣導今附於後

養生方導引法云一足踏地一足屈膝兩手抱犢鼻下急挽向身極勢左右換易四七去痔五勞三里氣不下

又云踞坐合兩膝張兩足不息兩通治五痔

又云兩手抱足頭不動足向口受氣衆節氣散來去三七欲得捉左右側身各急挽腰不動去四支腰上下髓內冷血冷筋急悶痔

又云兩足相踏向陰端急蹙將兩手捧膝頭兩向極勢捧之二七竟身側兩向取勢二七前後努腰

七去心勞痔病

牡痔候

肛邊生鼠乳出在外者時時出膿血者是也

牝痔候

肛邊腫生瘡而出血者牝痔也

脈痔候

肛邊生瘡痒而復痛出血者脈痔也

腸痔候

肛邊腫核痛發寒熱而血出者腸痔也

血痔候

因便而清血隨出者血痔也

重刊巢氏諸病源候總論卷之三十四

重刊巢氏諸病源候總論卷之三十五

瘡病諸候 九六十五論

頭面身體諸瘡候

夫內熱外虛爲風濕所乘則生瘡所以然者肺主氣候於皮毛脾主肌肉氣虛則膚腠開爲風濕所乘內熱則脾氣溫脾氣溫則肌肉生熱也濕熱相搏故頭面身體背生瘡其瘡初如皰須臾生汁熱盛者則變爲膿隨蹇隨發

頭面身體諸瘡候

諸瘡又瘡者內熱外虛爲風濕所乘則頭面身體生

瘡其藏內熱實氣盛熱結肌肉其熱留滯不歇故瘡經久不瘥

諸惡瘡候

諸瘡生身體皆是體虛受風熱風熱與血氣相搏故發瘡若風熱挾濕毒之氣者則瘡痒痛焮腫而瘡多汁身體壯熱謂之惡瘡也

養生方云銅器蓋食汁入食發惡瘡內疽也

又云醉而交接或致惡瘡 又云飲酒熱未解以

冷水洗面令惡瘡輕者獻炮 又云五月五日取

棗葉三升并華水擣取汁浴永不生惡瘡 又云

并華水和粉洗足不病惡瘡其湯熨針石別有正方補養宣導今附於後

養生方導引法云龍行氣叩頭下視不息十二通愈風疥惡瘡熱不能入

又云五月一日八月二日九月九月十日十月七日十一月四日十二月十三日沐浴除惡瘡

又惡瘡候

夫體虛受風熱濕毒之氣則生瘡痒痛焮腫多汁壯熱謂之惡瘡而濕毒氣盛體外虛內熱其瘡漸增經久不瘥為又惡瘡

癩瘡候

癩瘡者由膚腠虛風濕之氣折於血氣結聚所生
多著手足間迤相對如新生菜莖子痛痒抓搔成
瘡黃汁出浸淫生長折裂時瘡時劇變化生蟲故
名癩瘡

燥癩瘡候

膚腠虛風濕搏於血氣則生癩瘡若濕氣少風氣
多者其癩則乾燥但痒搔之白屑出乾枯拆痛此
蟲毒氣淺在皮膚故名燥癩瘡也

濕癩瘡候

濕癩者亦有匡郭如蟲行浸淫赤濕痒搔之多汁
成瘡是其風毒氣淺濕多風少故爲濕癩也其裏
亦有蟲

風癩候

風癩是惡風冷氣客於皮折於血氣所生亦作圓
文匡郭但抓搔頑痺不知痛痒其裏亦有蟲

白癩候

白癩之狀白色皴皴然而痒此亦是腠理虛受風
風與氣并血澀而不能榮肌肉故也

牛癩候

俗云以盆器盛水飲牛用其餘水洗手面即生癬
名牛癬其狀皮厚抓之韌強而痒是也其裏亦生
蟲

圓癬候

圓癬之狀作圓文隱起四畔赤亦痒痛是也其裏
亦生蟲

狗癬候

俗云狗舐之水洗手面即生癬其狀微白點綴
相連亦微痒是也其裏亦生蟲

雀眼癬候

疥者有數種有大疥有馬疥有水疥有乾疥有濕
疥多生手足乃至遍躰大疥者作瘡有膿汁焮赤
痒痛是也馬疥者皮內隱鱗起作根蟻搔之不知
痛此二者則重水疥者瘡癩如小瘰漿摘破有水
出此一種小輕乾疥者但痒搔之皮起作乾痂濕
疥者小瘡皮薄常有汁出並皆有蟲人往往以針
頭挑得狀如水內癩蟲此悉由皮膚受風邪熱氣
所致也

按九蟲論云蛻蟲多所變化多端或作癩疥痔癰
無所不為其湯礮針石別有正方補養宣導今附

於後

養生方導引法云龍行氣叩頭下視不息十二通愈風疥惡瘡熱不能入

乾疥候

乾疥但痒搔之皮起作乾痂此風熱氣深在肌肉間故也

湿疥候

湿疥起小瘡皮薄常有水汁出此風熱氣淺在皮膚間故也

熱瘡候

諸陽氣在表陽氣盛則表熱因運動勞役腠理則虛而開為風邪所客風熱相搏留於皮膚則生瘡初作癩漿黃汁出風多則痒熱多則痛血氣乘之則多膿血故名熱瘡也

冷瘡候

凡身體發瘡皆是風熱所為然血虛者亦傷於邪若重觸風寒則冷氣入於瘡令血澀不行其瘡則頑令不知痛痒亦經久難瘥名為冷瘡

疽瘡候

此疽瘡是癘之類也非癘疽之疽世云癘疽卽是

此也多發於支節脚脛間相對而作細孔如針頭其裏有蟲痒痛搔之黃汁出隨瘡隨發皆是風邪客於皮膚血氣之所變生亦有因諸淺瘡經久不瘥痒痛抓搔之或衣揩拂之其瘡則經久不瘥而變作諸瘡者裏皆有細蟲

甲疽候

皮厚甲錯剥起是也其瘡亦痒痛常皆是風邪折於血氣所生而

瘡裏亦有蟲

查疽候

查疽之狀隱胗赤起如今查樹子形是也亦是風邪客於皮膚血氣之所變生也其瘡內有蟲亦痒痛時焮腫汁出

頑疽候

此由風湿客於皮膚血氣變隱胗生瘡痒而不痛故名頑疽

振疽候

振疽是諸雜瘡帶風湿苦痒數以手抓搔振觸便侵食澗久不瘥乃變生蟲故名振疽

月食瘡候

月食瘡生於兩耳及鼻面間并下部諸孔竅側侵食乃至筋骨月初則瘡盛月末則瘡衰以其隨月生因名之為月食瘡也又小兒耳下生瘡亦名月食世云小兒見月以手指指之則令病此瘡也其生諸孔竅有蟲久不瘥則變成癩也

天上病候

天上病者人神采昏塞身體沉重下部生瘡上食五臟甚者至死世人隱避其名故云天上病也此是腑臟虛腸胃之間蟲動侵食人五臟故也

甜瘡候

甜瘡生面上不痒不痛常有肥汁出汁所溜處隨即成瘡亦生身上小兒多患之亦是風濕搏於血氣所生以其不痒不痛故名甜瘡

浸淫瘡候

浸淫瘡是心家有風熱發於肌膚初生甚小先痒後痛而成瘡汁出侵潰肌肉浸淫漸潤乃徧體其瘡若從口出流散四肢則輕若從四肢生然後入口者則重以其漸漸增長因名浸淫也

反花瘡候

反花瘡者由風毒相搏所為初生如飯粒其頭破

則血出便生惡肉漸大有根膿汁出肉反散如花狀因名反花瘡凡諸惡瘡久不瘥者亦惡肉反出如反花形

瘡建候

人身上患諸瘡熱氣盛者腫焮痛附畔別結聚狀如癩癧者名為瘡建亦名瘡根也

王爛瘡候

王音旺

王爛瘡者由腑臟實熱皮膚虛而受風濕與熱相搏故初起作癩漿漸漸王爛汁流浸潰爛故名王爛也亦名王灼瘡其初作癩漿如湯火所灼也又

名洪燭瘡初生如沸湯酒作癩漿赤爛如火燭故名洪燭也

白頭瘡候

白頭瘡者由體虛帶風熱遍身生瘡瘡似大疥痒漸白頭而有膿四邊赤疼痛是也

無名瘡候

此瘡非癰非疽非癬非疥狀如惡瘡或癢或劇人不能名故名無名瘡也此亦是風熱搏於血氣所生也

猪灰瘡候

猪灰瘡者坐處生瘡赤黑有竅深如大豆許四邊
青中央圻作臼陷而不甚痛狀如猪灰因以為名
此亦是風熱搏於血氣所生也

不痛瘡候

諸瘡久不瘥觸風冷有惡肉則搔針灸不覺痛因
以不痛為名

鴈瘡候

鴈瘡者其狀生於體上如濕癬溼瘍多著四支乃
遍身其瘡大而熱疼痛得此瘡者常在春秋二月
八月鴈來時則發鴈去時便瘥故以為名亦鴈過

荆漢之域多有此病

蜂窠瘡候

其瘡如疽癰之類有小孔象於蜂窠因以為名此
亦風濕搏於血氣之所生也

斷咽瘡候

此瘡繞頸而生皮傷赤若匝頸則害人此亦是風
濕搏於血氣之所生也

毒瘡候

此由風氣相搏變成熱毒而生瘡於指節或指頭
初似疥甚痒經宿乃紫黑也

瓠毒瘡候

俗云人有用瓠花上露水以洗手遇毒即作瘡因以名之

晦瘡候

其瘡生皆兩兩相對頭戴白膿俗云人有誤小便放籠處即生此瘡小兒多患也

集瘡候

此瘡十數箇集生一處因以為名亦是皮膚偏有虛處風濕搏於血氣變生

屋食瘡候

方云犯屋示所為未詳其形狀

烏啄瘡候

烏啄瘡四畔起中央空是也此亦是風濕搏於血氣之所變生以其如烏鳥所啄因以名之也

攝領瘡候

攝領瘡如癬之類生於頸上痒痛衣領拂着即劇云是衣領指所作故名攝領瘡也

雞督瘡候

雞督瘡生脇傍此瘡亦是風濕搏於血氣之所變生以其形似雞屎因為名也

斷耳瘡候

斷耳瘡生於耳邊久不瘥耳乃取斷此亦月食之類但不隨月生長為異此瘡亦是風濕搏血氣所生以其斷耳因以為名也

新婦瘡候

此瘡狀繞腰生如蠅虻屎但不痛為異耳此瘡亦是風濕搏血氣所生而世人呼之為新婦瘡也

土風瘡候

土風瘡狀如風胗而頭破乍發乍瘥此由肌腠虛疎風塵入於皮膚故也俗呼之為土風瘡也

逸風瘡候

逸風瘡生則遍體狀如癬疥而痒此由風氣散逸於皮膚因名逸風瘡也

醜帶瘡候

醜帶瘡者繞腰生此亦風濕搏血氣所生狀如醜帶因以為名又云此瘡繞腰市則殺人

兔齧瘡候

凡疽發於脛名曰兔齧瘡一名血實瘡又隨月生死蓋月食之類非脛瘡也尋此瘡亦風濕搏於血氣血氣實熱所生故一名血實又名兔齧者亦當

以其形狀似於兔齧因以為名

血瘡候

血瘡者云諸患風濕搏血氣而生瘡其熱氣發逸瘡但出血者名為血瘡也

瘡中風寒水候

凡諸瘡生之初因風濕搏血氣發於皮膚故生也若久不瘥多中風冷水氣若中風則喋瘡中冷則難瘥中水則腫也

露敗瘡候

凡患諸瘡及惡瘡初雖因風濕搏血氣蘊結生蒸

發皮肉成瘡若觸水露氣動經十數年不瘥其瘡瘀黑作痂如被霜皴皮瘡內肉似斷故名露敗瘡也

瘡惡肉候

諸瘡及癰疽皆是風濕搏血氣血氣蘊結生熱而發肌肉成瘡久不瘥者多生惡肉四邊突起而好肉不生此由毒熱未盡經絡尚壅血氣不到故也

瘡瘥復發候

諸惡瘡皆因風濕毒所生也當時雖瘥其風毒氣猶在經絡者後小勞熱或食毒物則復更發

漆瘡候

漆有毒人有稟性畏漆但見漆便中其毒喜面痒
然後背臂胫脰皆悉癢痒面為起腫繞眼微赤諸
所痒處以手搔之隨手輦展起赤痞癩痞消已
生細粟瘡甚微有中毒輕者證候如此其有重者
遍身作瘡小者如麻豆大者如棗杏膿焮疼痛摘
破小定有小瘰隨次更生若火燒漆其毒氣則厲
著人急重亦有性自耐者終日燒灸竟不為害也

凍爛腫瘡候

嚴冬之月觸冒風雪寒毒之氣傷於肌膚血氣壅
滯因即瘰凍焮赤疼腫便成凍瘡乃至皮肉爛潰

重者支節墮落

夏日沸爛瘡候

盛夏之月人膚腠開易傷風熱風熱毒氣搏於皮
膚則生沸瘡其狀如湯之沸輕者而市如粟粒重
者熱汗浸漬成瘡因以為名世呼為沸子也

傷瘡病諸候

凡四論

湯火瘡候

凡被湯火燒者初慎勿以冷物及井下泥屎泥及
蜜淋搨之其熱氣得冷即却深搏至骨爛人筋也
所以人中湯火後喜攣縮者良由此也

灸瘡急腫痛候

夫灸瘡膿潰已後更焮腫急痛者此中風冷故也
灸瘡久不瘥候

夫灸之法中病則止病已則瘡瘥若病勢未除或
中風冷故久不瘥也

針灸瘡發洪候

夫針灸皆是節穴俞募之處若病甚則風氣衝擊
於瘡凡血與氣相隨而行故風乘於氣而動於血
血從灸瘡處出氣盛則血不止名為發洪

重刊巢氏諸病源候總論卷之三十五

重刊巢氏諸病源候總論卷之三十六

獸毒病諸候

凡四論

馬齒踰人候

凡人被馬齒踰及馬骨所傷刺并馬韁鞞勒所傷
皆為毒瘡若腫痛致煩悶是毒入腹亦斃人

馬毒入瘡候

凡人先有瘡而乘馬汗并馬毛垢及馬屎尿及坐
馬皮鞞並能有毒毒氣入瘡致焮腫疼痛煩熱毒
入腹亦斃人

狗狗咬候

凡狗咬人七日輒一發過三七日不發則無苦也。要過百日方大免耳。當終身禁食犬肉及蠱蛹食。此發則死不可救矣。瘡未愈之間禁食生魚猪雞膩。過一年禁之乃佳。但於飲下飯蒸魚及於肥器中便發。若人曾食落葵得犬咬者自難治。若瘡瘥十數年後食落葵便發。

狗咬重發候

凡被狗咬瘡忌食落葵及狗肉。云雖瘥經一二年但食此者必重發。重發者與初被咬不殊。其獠狗咬瘡重發則令人狂亂如獠狗之狀。

蛇毒病諸候

凡五論

蛇螫候

凡中蛇不應言蛇皆言蟲及云地索勿正言其名也。惡蛇之類甚多而毒有瘥劇時。四月五月中青蛙三角蒼虺白頸犬蜴。六月七月中竹狩艾嫂黑甲赤日黃口反鈎白蛙三角。此皆蛇毒之猛者。中人不即治多死。又有赤連黃頰之類。復有六七種而方不盡記。其名水中黑色者名公蠟。山中一種亦相似。不常聞螫人。又有鉤蛇尾如鉤能倒牽人獸入水。浸而食之。又南方有咬蛇人忽傷之不死。

終身伺覓其主不置雖百人衆中亦直來取之惟
遠去出百里乃免耳又有蛇長七八尺如船拖
狀毒人必死即削取船拖煮汁漬之便瘥但蛇例
雖多今皆以青條矯尾白頸艾蝮其毒尤劇大者
中人若不即治一日間舉體洪腫皮肉圻爛中者
尚可得二三日也
被蛇螫第一禁第二藥無此
二者有全劑雄黃
百可預辦故山居者宜令知
禁法也又惡蛇螫
八即頭解散言此蛇名黑帝
其瘡冷如凍凌此
每惡不治一日即死若頭不
散此蛇名赤帝其毒
小輕瘡上冷不治故得七日

死凡蛇瘡未愈禁熟食熱食便發治之依初被螫
法也

蝮蛇螫候

凡蝮中人不治一日死若不早治之縱不死者多
殘斷人手足蝮蛇形乃長頭扁口尖頸斑身亦艾
斑色青黑人犯之頸腹帖著地者是也江東諸山
甚多其毒最烈草行不可不慎又有一種狀如蝮
而短有四腳能跳來嚙人名曰千歲蝮中入必死
然其嚙人竟即跳上樹作聲云斫木者但管棺具
不可救若云擗救者猶可治具音呼藥為救故也

虺螫候

虺形短而禰身亦赤黑色山草自不甚多每六七月
中夕時出路上喜入車轆中令車轆腹破而子
出人侵晨及冒昏行者每傾意看之其螫人亦往
往有死者

青蛙蛇螫候

青蛙蛇者正綠色喜綠樹及竹上自掛與竹樹色
一種人看不覺若入林中行有落人項背上者然
自不傷螫人螫人而蛇無正形極大者不過
四五寸世人皆呼為青條蛇言其與枝條同色乍

看難覺其尾二三寸色黑者名蝮尾毒最猛烈中
人立死

蝮毒候

此是諸毒蛇夏日毒盛不泄皆齧草木及吐毒著
草木上人誤犯著此者其毒如被蛇螫不殊但瘡
腫上有物如蟲蛇眼狀以此別之名為蝮毒

雜毒病諸候

凡十四論

蜂螫候

蜂類甚多而方家不具顯其名唯地中大土蜂最
有毒一螫中人便即倒悶舉體洪腫諸藥治之皆

不能卒止舊方都無其法雖然不肯殺人有禁術
封唾亦微効又有瓠瓢蜂抑亦其次餘者猶瘥

蠍螫候

此蟲五月六月毒最盛云有八節九節者彌甚螫
人毒勢流行多至牽引四支皆痛過一周時始定

蠱螫候

陶隱居云蠱蟲方家亦不能的辯正云是蠅蚘子
或云是小烏蠱尾有兩歧者然皆恐非也疑即是
蠍蠍尾歧而曲上故周詩云彼都人士拳髮如蠱

蜈蚣螫候

此則百足蟲也雖復有毒而不甚螫人人誤觸之
者故時有中其毒

蜈蚣著人候

江東及嶺南無處不有蜈蚣蜈蚣乃是兩種物蜈
者在草裏名為山蜈在水裏名馬蜈皆長四五寸
許黑色身滑人行涉山水即著人肉不甚痛而痒
兩頭皆能啣人血血滿腹便自脫地無甚毒害蜈
者無不背作文理粗澀多著龜螺殼上若著人肉
即於肉裏生子乃至十數枚經日便腫痒隱軫起
又又亦成瘡癩

石蛭螫人候

山中草木及路上石上石蛭著人則穿嚼肌皮行人肉中浸淫起瘡灸斷其道則愈凡行山草之中常以膏和藥塗足脛則蛭不得著人

蠱螫候

蠱既是人養之物性非毒害之蟲然時有螫人者乃令人增寒壯熱經時不瘥亦有因此而致斃斯乃一時之怪異救解之方愈

甘鼠螫候

此即鼯鼠也形小而口大多食傷牛馬不甚痛云

其口舛故名甘鼠時有螫人者

諸魚傷人候

魚類甚多其鮪魷鰩鮫之徒鬚骨芒刺有毒傷人則腫痛

惡蠅螫候

房中切

惡蠅一名滿大如毒婢似蝗無尾前有两角觸後則傍後觸前則却行生於樹皮內及屋壁間又喜在紙書內圓似榆莢其色赤黑背橫理二月生十月蟄蝥人唯以三時五月六月七月九毒初如癩狀中央紫黑大如粟粒四傍微腫焮焮色赤或有

青色者痒喜搔之若飲酒房室近不過八九日遠不過十餘日爛潰為膿汁亦殺人

蚘尿刺候

云是野狐尿棘刺頭有人犯之者則多中於人手指足指腫痛焮熱有端居不出而着此毒者則不
必是狐尿刺也蓋惡毒氣耳故方亦云惡刺毒者也

蚝蟲螫候

此則樹上蚝蟲耳故名蚝毛此毒以其毛刺能螫人蓋輕不至深斃然亦甚痛螫處作軫起者是也

蠖螋尿候

蠖螋蟲云能尿人影即令所尿之處慘痛如芒刺亦如蚝蟲所螫然後起細痞癩作聚如茱萸子狀其痞癩徧赤中央有白膿如粟粒亦令人皮肉拘急惡寒壯熱極者連起多着腰脇及胷若繞腰匝
徧者重也

入井塚墓毒氣候

凡古井塚及深坑窀穸中多有毒氣不可輒入五月六月間最甚以其鬱氣盛故也若事輒必須入者
先下雞鴨毛試之若毛旋轉下即是有毒便不可入

金瘡病諸候

凡二十三論

金瘡初傷候

夫被金刃所傷其瘡多有變動若按瘡邊乾急肌肉不生青黃汁出瘡邊寒清肉消臭敗前出赤血後出黑血如熟爛骨及血出不止白汁隨出如是者多凶若中絡脉髀內陰股天聰眉角橫斷腓腸乳上及與鳩尾攢毛小腹尿從瘡出氣如賁脉及腦出諸瘡如是者多凶少愈診金瘡血出太多其脉虛細者生數實大者死小者生浮大者死所傷在陽處者去血四五斗脉微緩而遲者生急疾者死

金瘡血不止候

金瘡血出不斷其脉大而止者三七日死金瘡血出不可止前赤後黑或黃或白肌肉腐臭寒冷鞞恐者其瘡難愈亦死

金瘡內漏候

金瘡通內血多內漏若腹脹滿兩脇脹不能食死瘰血在內腹脹脉牢大者生沉細者死

毒箭所傷候

夫被弓弩所傷若箭鏃有齒藥入人皮脉令人短氣須臾命絕口噤唇乾血為斲絕腹滿不言其人如醉未死之間為不可治若榮衛青瘀血應時出

瘡邊溫熱口開能言其人乃活毒前有三種嶺南
夷俚用焦銅作箭鏃次嶺北諸處以蛇蟲毒熬物
汁着管中清箭鏃此二種纔傷皮便洪腫沸爛而
死唯射豬犬雖因得活以其嗽糞故也人若中之
便即食糞或飲糞汁并塗瘡即愈不爾須臾不可
復救茵箭着寘處者雖困漸治不二死若近胃腸
便宜速治小緩毒入內則不可救

金瘡腸出候

此謂為矛箭所傷若中於腹則氣激氣激則腸隨
瘡孔出也

金瘡腸斷候

夫金瘡腸斷者視病深淺各有死生腸一頭見者
不可連也若腹痛短氣不得飲食者大腸一日半
死小腸三日死腸兩頭見者可速續之先以針縷
如法連續斷腸便取雞血塗其際勿令氣泄即推
內之腸但出不斷者當作大麥粥取其汁持洗腸
以水漬內之當作研米粥飲之二十餘日稍作強
糜食之百日後乃可進飲耳飽食者令人腸痛決
漏常服錢屑散若腸腹腫暗從瘡出有死者有生
者但視病取之各有吉凶腫出如手其下牢核煩

滿短氣發作有時不過三日必死。腫下不留安足不煩喘息如故。但瘡痛者當以生絲縷繫之。其血脉當令一宿乃可截之。勿閉其口。膏稍導之。

金瘡筋急相引痛不得屈伸候

夫金瘡愈已後肌肉充滿不得屈伸者。此由傷絕經筋榮衛不得循行也。其瘡雖愈筋急不得屈伸也。

金瘡傷筋斷骨候

夫金瘡始傷之時半傷其筋榮衛不通其瘡雖愈合後仍令痺不仁也。若被瘡截斷諸解身軀肘中及腕膝髀若踝際亦可連續。湏急及熱其血氣未

寒碎骨便更縫連其愈後直不屈伸若碎骨不去令人痛煩膿血不絕不絕者不得安諸中傷人神十死一生

箭鏃金刃入肉及骨不出候

箭鏃金刃中骨骨破碎者須令箭鏃出仍應除碎骨盡乃傳藥不爾瘡永不合縱合常疼痛若更犯觸損傷便驚血沸漬有死者

金瘡中風瘧候

夫金瘡瘧者此由血脉虛竭飲食未復未滿月日榮衛傷穿風氣得入五藏受寒則瘧其狀口急背

直捶頭馬鳴腰為反折須臾大發氣息如絕汗出如雨不及時救者皆死凡金瘡卒無汗者中風也遷自出黃汁者中水也並欲作瘞急治之又痛不在瘡處者傷經絡亦死

金瘡驚腫候

夫金瘡愈閉後勿驚腫動起糜沸跳手大者如盂小者如盃名為盜血此由肌未定裏不滿因作勞起早故令盜血涌出在人皮中不肯自消亦不成膿反勞核又有加血加血者盜血之滿也其血凝深不可妄破破之者盜血前出不可禁止加血迫

之出即滿瘡中便留止令人短氣須臾命絕

金瘡因交接血驚出候

夫金瘡多傷經絡去血損氣其瘡未瘥則血氣尚虛若因而房室致情意感動陰陽發泄驚觸於瘡故血汁重出

金瘡驚悸候

金瘡失血多者必驚悸以其損於心故也心主血血虛則心守不安心守不安則喜驚悸者心動也

金瘡煩候

金瘡損傷血氣經絡空虛則生熱熱則煩痛不安也

金瘡欬候

金瘡傷血損氣氣者肺之所主風邪中於肺故欬也

金瘡渴候

夫金瘡失血則經絡空竭津液不足腎臟虛燥故渴也

金瘡蟲出候

夫金瘡久不瘡及裹縛不如法瘡內敗壞故生蟲也

金瘡着風候

夫金瘡乾無汁亦不大腫者中風也寒氣得大深者不藏便發作瘰多凶少愈中水者則腫多汁或成膿

金瘡着風腫候

此由瘡着於風風氣相搏故腫也

金瘡成癰腫候

夫金瘡冬月之時衣厚絮溫故裹欲薄夏月之時衣單日涼故裹欲厚重寒傷榮重熱傷衛筋勞結急肉勞驚腫骨勞折沸難可屈伸血脉勞者變化作膿榮衛不通留結成癰凡始縫其瘡各有縱橫雞舌隔角橫不相當縫亦有法當次陰陽上下逆順急緩相望陽者附陰陰者附陽腠理皮脉復令復常但亦不曉略作一行陰陽閉塞不必作膿榮

衛不通留結為癰晝夜不卧語言不同碎骨不去
其人必凶雞舌隔角房不相當頭毛解脫忘失故
常瘡不再縫膏不再漿

金瘡中風水候

夫金瘡裹縛不密為風水氣所中則疼痛不止而
腫痛内生青黃汁

金瘡下血虛竭候

全乃中於經絡者下血必多腑臟空虛津液竭少
無血氣榮養故須補之

金瘡久不瘥候

夫金瘡有久不瘥者膿汁不絕肌肉不生者其瘡
內有破骨斷筋伏血腐肉缺刃竹刺久而不出令
瘡不愈喜出青汁當破出之瘡則愈

腕傷病諸候

凡九論

被打頭破腦出候

夫被打陷骨傷頭腦眩不舉戴眼直視口不能語
咽中沸聲如狔子喘口急手為妄取日不死三日小
腕折破骨傷筋候

凡人傷折之法即夜盜汗者此髓斷也七日死不
汗者不死

卒被損瘀血候

夫有瘀血者其人喜忘不欲聞物聲病人胃滿唇
萎舌青口燥但欲漱水不欲咽無熱脈微大來遲
腹不滿其人言我腹滿為有瘀血汗當出不出內
結亦為瘀病人胃滿口乾臍痛渴無寒熱為弱瘀
血腹滿口燥不渴唾如漿狀此有留血尔從高頓
仆內有血腹脹滿其脈牢強者生小弱者死得咎
掠內有結血脈實大者生虛小者死其湯熨針石
別有正方補養宣導今附於後

養生方導引法云端坐生腰舉左手仰掌以右手

承右脇以鼻內氣自極七息除瘀血結氣

又云鼻內口閉有極七息除兩脇下積血氣

云端坐生腰舉左手右手承右脇鼻內氣七息除
瘀血

又云端坐右手持腰鼻內氣七息左右尻

頭各三十止除體瘀血項頸痛

又云雙手搦腰

手指相對向盡勢前後振搖二七又將手大指向

後極勢振搖二七不移手上下對與氣下盡勢來

去三七去雲門腰掖血氣閉塞

壓逆墜墮內損候

首貴

此為人卒被重物壓逆或從高墜下致吐下血此

傷五內故也

腕傷初繫縛候

夫腕傷重者為斷皮肉骨髓傷筋脉皆是卒然致損故血氣隔絕不能同榮所以須善繫縛按摩導引令其血氣復

被損又瘀血候

此為被損傷仍為風冷搏故令血瘀結在內又不得也

腕折中風瘳候

夫腕折傷皮肉作瘡者慎不可當風及自扇若風